



Ota keskustelu

Informasuunia ja neuvoja täysile lapsitten turvalisuusta
verkostossa ja sen ulkopuolela

Sie olet ratkaseva lapsitten turvalisuuiele

Ratkasevaa lapsitten turvalisuuiele oon se ette sie, huoltajanna elikkä muuna tärkeännä täytenä osalistut lapsitten elälmään niin verkostossa ko sen ulkopuolela. Mutta se ei ole aina helppo tietää kunka sie puhut vaikeista aiheista ilman ette loukata lapsen integriteettiä.

Tässä folterissa sie saat tipsiä ja neuvoja kunka sie täytenä saatat puhua lapsen kansa seksyellistä väärinkäytöstä verkostossa ja sen ulkopuolela.

Lapsitten olo verkostossa

Suuri osa lapsitten ja nuoritten elämästä tapahtuu verkostossa – paikka kehitykselle, inspirasuunille ja yhteydelle. Verkostossa ja sen ulkopuolella ei ole juuri mitään elämänraijaa. Flörttaaminen, rakastuminen ja seksi oon luonoliset osat nuoritten verkoston arkipäivästä. Sen takia turvalisuus sisälä verkostossa pittää olla yhtä ittesthääns selvää ko verkoston ulkopuolella, ja täyet tarttevat puhua niin riskistä ko mahdollisuuksista.

Kukas rikoksentekiä oon – ja missäs riskit oon?

Ecpat saapii useasti kysymyksiä kuka lapsista tekkee uhrin ja mitä appia pittää välttää. Vastaus oon ette se saattaa olla kuka hyvänsä – niin täyet ko muut lapset – ja ette rikoksentekiöitä oon missä lapsia oon. Sen takia se oon tärkeätä ette täyet oon osalistuvat yhtä paljon lapsitten elämässä verkostossa ko sen ulkopuolella, ja saattavat välittää tietoa laista ja säänöistä jotka sielä jälleavat.



Niin sie saat keskustelun käynthiin

Se oon tärkeätä näyttää innostusta lapsen elämähän verkostossa ja pittää aukenhaisen mielen siitä mitä net kertovat – elikkä valikoittevat ette ei kertoa. Puhu useasti, ei aivan kerran. Kysy lapsen päivästä verkostossa samhaan laihiin ko sie kysyt minkälaista hällä oon ollu koulussa. Ecpat Täysituessa/ Ecpat Vuxenstöd sie löyät keskusteluophaita joissako oon tipsiä kunka sie saatat puhua niin nuoremitten ko vanheemitten lapsitten kansa kropasta, rajoista, suostumisesta, seksistä ja suhteista. Ole selvä siitä ette sie olet sielä ja kuuntelet – heän ehoila ja ilman ette syyttää lapsia.



ecpat.se/vuxenstod/keskusteluophaita/

Miksis lapset lähättävät alastonkuvia?

Flörttaaminen, rakastuminen ja seksi oon luonolinen osa lapsitten elämästä – verkostossaki. Ette lähättää ja saaja alastonkuvia oon useasti osa tutkimisesta eikä tarte olla vaaralista niin kauvon ko suhe oon moleminpuolinen ja kunnioittava.

Samala monet lapset ja nuoret kertovat ette heilä ei ole tietoa mikä oon okei ja ei. Se tekkee ette net ei aina ole tioliset koska het oon joutunheet rikolisuuhen uhriksi – elikkä koska net itte riskeeraavat tehjä rikolisuuhen. Sen takia se oon tärkeätä ette täyet praativat lapsitten kansa suostumisesta, rajoista ja laista verkostossaki.



Tipsiä kunka praatia lapsitten kansa alastonkuvista

- Praati varhain suostumisesta verkostossa.
- Auta lasta käsittämhään mikä oon lailista ja mikä ei ole lailista koskevan alastonkuvia.
- Ole selvä siitä ette lapsi aina saattaa tulla sinun työ jos jotaki oon tapahtunnu.
- Älä koskhaan tehe lasta syypääksi jos se oon lähättänny alastonkuvia.
- Ette uhata mupili- elikkä appikielosta saattaa tehjä ette lapsi ei kerro ko jotaki huonoa tapahtuu.
- Ilmota polisille jos lapsi oon joutunu rikolisuuhen uhriksi – se ei ole vähempi vakava sen takia ette se oon tapahtunnu verkostossa.

Ko alastonkuvia ja filmiä levitethään

Tunneks lasta jonka alastonkuvia oon levitetty? Alastonkuvitten ja filmitten levittämistä mennee topata. Ecpat tarjoa tukilinjan jossako met saatama auttaa lapsia ja nuoria saahmaan pois väärinkäyttömateriaalia verkostosta ja sen mukhaan estää ette net levitethään. Met saatama kansa panna kiini konttuja sosiaalissa meetioissa. Lapsi saapii apua ja tukea Sinun Ecpat/Ditt Ecpat kautta – sivu lapsile ja nuorile.

Täytenä sie saatat ilmottaa eppäilyjä seksyellistä väärinkäyttöistä lapsia kohin Ecpat Hotline:heen. Se saatta esimerkiksi olla exposekontuista, groominkista elikkä alastonkuvista ja filmistä jotka levitethään verkostossa.

***Kohta kolme
neljästä lapsesta
oon saahneet
ei-toivottua
alastonkuvvaa.***

Ecpat:in tutkimus
"Nude verkostossa"/
Nude på nätet 2023.



Ecpat Hotline



Sinun Ecpat/ Ditt Ecpat

Ensimmäinen apu

jos lapsi oon joutunu uhriksi – elikkä jos sie eppäilet ette jotaki oon tapahtunnu

Signaaliia ette oon joutunu uhriksi

Ole herheilä muutoksista, esimerkiksi nukkumisvaikeuksista elikkä masentumisen olosta. Net saattavat olla merkit ette lapsi oon joutunu uhriksi eikä voi hyvin. Lapset saattavat pölätä ette heitä ei uskota elikkä kunka täysi reakeeraa. Sen takia net saattavat "testipraatia" kertomalla mitä yks kaveri oon tehny elikkä jotaki mitä net oon kuuhleet. Kuuntele ja vältä ette sie et tuomitte elikkä suuttu.

Tohi kysyä – ole rauhalinen ja kuuntele

Vaikka sie et saa vastausta ensimmäisenä kertana ko sie kysyt, sie näytät ette sie välität ja ette se oon okei ette kertoa. Anna mennä vähän aikaa ja yritä uuesti muussa yhteydessä. Monet nuoret viivyttelivät kertomasta pölöstä ette tehjä täyen pettynheeksi elikkä vihaseksi. Anna lapsen puhua valhmiiksi ennen ko sie alat kyshyyn ja kunnioita ko lapsi ei halvaa praatia.

Helpota häpeästä ja syylisyydestä

Lapsi tuntee useasti häpyä ja syylisyyttä ko net oon joutunheet uhriksi. Auta lasta käsittämhään ette se mitä oon tapahtunnu ei koskhaan ole niitten syy.

Ilmota polisille jos sie eppäilet rikolisuutta

Ilmota polisille jos sie eppäilet ette lapsi oon joutunu rikolisuuhen uhriksi. Sie et tartte olla varma jos jotaki oon rikolista, se oon polisin asia tutkia. Säästä toistuksia niinku esimerkiksi chattia, käyttäjänimiä elikkä kuvia. Muista ette se oon yhtä vakavaa ette joutua uhriksi verkostossa ko sen ulkopuolela.

Tehe kiusailmotus jos sie olet kiusoissa lapsesta

Jos sie eppäilet ette lapsi oon vaarassa sie piät aina tehjä kiusailmotuksen. Se oon sosiaalipalvelun tehtävä ette arvioija mitä tukea tarttee.

Huolehti ette lapsi saapii tukea

Lapsela, joka oon joutunu uhriksi, oon oikeus saaja tukea – ja joskus se oon helpompi puhua jonku kansa perheen ulkopuolela. Hae apua, esimerkiksi koulukyrattorin elikkä nuorisovasthaanoton kautta. Lapsi saattaa kansa tjtata anonyymisti: **dittecpat.se**.

Hae epua itte jos sie tarttet

Ette lapsi oon joutunu uhriksi saattaa herättää paljon voimakhaita tuntheita sinussa täytenä eikä se ole aina helppo tietää kunka sie piät akerata. Hae tukea jos sie tarttet, esimerkiksi osotheela: **ecpat.se/vuxenstod**.

Mitäs laki sannoo?

Ette sulla täytenä oon tietoa mitä laki sannoo oon ratkasevvaa ette sie saatat opettaa lapsele mikä oon okei ja mikä ei ole ko oon kyse seksistä, alastonkuvista ja suostumisesta niin verkostossa ko sen ulkopuolela.

Ikärajoja

Kaikki alle 18 vuotta vanhaat henkilöt oon lapsia ja niillä oon oikeus suohjaan seksyellistä väärinkäytöistä. Mitä vanheempi lapsi oon sen suurempi oikeus ette päättää itte. 15 vuen ikäsestä lähtien lapsi saattaa suostua sekshiin. Pääsääntö oon ette seksi alle 15 vuotisitten lapsitten kansa oon rikolista riippumatta jos lapsi oon suostunu elikkä ei. Poikkeus oon jos oon pieni ikäväli niillä joilako oon seksiä ja jos se ei ole kyse väärinkäytöstä. 15 vuen ikäsestä lähtien lapset oon rangastusikäset ja niitä mennee tuomita rikolisuuesta.

Väärinkäyttöä tapahtuu verkostossaki

Laki ei erota seksiä joka tapahtuu fyysisesti ja seksiä joka tapahtuu verkostossa. Jos joku saapii alle 15 vuen lapsen tekheen seksyelliä tekoa ittele viiteotjatissa elikkä ko lapsi filmaa itteä se oon seksyaalirikolisuus samhaan laihiin ko silloin ko net olisit samassa paikassa.

Näin laki sannoo:

- Ette antaa lapsile korvausta seksyellistä teoista oon aina rikolista. Korvaus ei tartte olla rahassa, se saattaa kansa olla kyse esimerkiksi alkohoolista, paperossista ja merkkipaatheista.
- Ette lapsela oon alastonkuva ittestä ei ole rikolista. Ette pittää alastonkuvvaa muusta lapsesta joka ei ole ollu pyperteetissä oon rikolista. Vississä taphauksissa se saattaa olla rikolista ko se koskee pyperteetikehittynheitä lapsiaki.
- Ette lähättää alastonkuvia jollekki joka oon alle 15 vuotta oon pääsääntönä rikolista. Se saattaa kansa olla rikolista ette tahtoa alle 15 vuotta vanhaalta lapselta alastonkuvvaa.
- Ette lähättää ei-toivottua alastonkuvvaa jollekki joka oon yli 15 vuotta oon rikolista ja ette tahtoa alastonkuvvaa joltaki yli 15 vuotihaalta semmosella laila joka oon seksyellisti loukkaava oon rikolista.
- Ette levittää jonku muun alastonkuvvaa oon rikolista.
- Ette uhata, talkata elikkä kiristää lapsia seksyelhiin tekhoiin oon aina laitonta.

Älä koskhaan viivyttelä ette ilmottaa!

Jos lapsi oon joutunu seksyellin väärinkäytön uhriksi se oon yhtä vakavaa – riippumatta jos se oon tapahtunnu verkostossa elikkä sen ulkopuolela. Se oon tärkeätä ette tapahtummaa tutkithaan. Soita polisille 114 14 ette tehjä ilmoitus. Sie saatat kansa käyvä polisasemalla. Jos rikolisuus oon käynnissä sie pitä aina soittaa 112.

Ecpat tekkee työtä ette estää ja topata seksyelliä väärinkäyttöä lapsia kohin



Lapset jakavat heän kokemuksiä ja elämyksiä meän tukilinjaa ja meän tutkimuksitten kautta. Se antaa meile ynikkiä tietoa lapsitten toelisuuesta ja auttaa meitä kehittämähän niin kunka met kohtelemma lapsia jotka tarttevat tukea ja kunka met annama tukea vanhuuksille ja muile täysile niitten arkipäivässä.

Ecpat Täysittentuki/Ecpat Vuxenstöd – sulle joka olet lapsitten likelä

Ecpat Täysittentuki/Ecpat Vuxenstöd oon sulle joka olet huolta- ja elikkä muu tärkeä täysi lapsitten likisyyessä. Täälä sie saat informasuunia ja ilhmaista neuvonantamista kunka sie saatat puhua lapsitten kansa seksyellistä väärinkäytöstä – niin es- tävässä tarkotuksessa ja ko jotaki oon tapahtunnu.

Sie saatat ottaa meän kansa yhtheyttä meilin kautta elikkä varata aijan keskustelulle telefoonissa.

Lue lissää ja varraa aika täälä



ecpat.se/vuxenstod